

**ՄԱՅՐ ԱԹՈՌ ՍՈՒՐԲ ԷՋՄԻԱՇՆՈՒՄ ՔԵՆԹՐԲԵՐԻԻ
ԱՐՔԵՊԻՍԿՈՊՈՍԻ ՆՎԻՐԱԿ ՀԱՅՐ ՖԻԼԻՊ ՍԹՈՐՐ
ՎԵՆԹՐԻ ԱՅՅԵԼՈՒԹՅՈՒՆԸ ԲԱՔՎԻ ՀԱՅՈՑ Ս. ԳՐԻԳՈՐ
ԼՈՒՍԱՎՈՐԻՉ ԵԿԵՂԵՑԻ**

1998 թվականի մայիսի 5-ին, երեքշաբթի, Ադրբեջանի Հանրապետության մայրաքաղաք Բաքու կատարած այցելության ընթացքում Մայր Աթոռում Քենթրբերիի Արքեպիսկոպոսի նվիրակ Հայր Ֆիլիպ Սթորր Վենթրն այցելեց Բաքվի Հայոց Ս. Գրիգոր Լուսավորիչ եկեղեցի, որը գտնվում է քաղաքի կենտրոնական մասում, հին քաղաքի արտաքին պարսպից դուրս՝ այգու շարակից:

Մեր ընթերցողներին հիշեցնենք, որ Ս. Գրիգոր Լուսավորիչ եկեղեցու բակում էր թաղված դարասկզբի մեր եկեղեցու մեծագույն հոգեւորականներից Կարապետ եպիսկոպոս Տեր-Մկրտչյանը: Ի՞նչ է հայտնում մեզ Հոգեշնորհ Հայրը:



Կարապետ եպիսկոպոս Տեր-Մկրտչյանի տապանաքարը

Ինձ չհաջողվեց գտնել հետքեր մեր տապանաքարից, որը գետնից բարձր էր այն վայրում, որն այժմ խոտածածկ մի տարածություն է: Այնտեղ չկային նաև այլ գերեզմանաքարեր (դատելով լուսանկարներից և իր խոսքերից՝ կարծում ենք, Հայր Ֆիլիպը ճիշտ տեղում չի փնտրել Կարապետ եպիսկոպոս Տեր-Մկրտչյանի գերեզմանը: Սակայն կարծում ենք, նաև չի բացառվում գերեզմանի պղծված լինելու հանգամանքը):

Ձեռքով արտաքին պահպանված տեսքի, եկեղեցին ներկայումս ցավալի տեսարան է ներկայացնում: Եկեղեցու ներսը ամբողջապես այրված է՝ պատերն ու առաստաղը հրդեհից սևացած: Արտաքին պատերը նույնպես կրում են հրդեհի հետքերը, որի ծուխը դուրս կողմից սև հետքեր է թողել նաև լուսամուկների և դռների քարավորներից: Հյուսիսային արտաքին պատի վրա եղած հայկական խաչերը փերված են, իսկ զանգակատան

արևմտյան կողմում գտնվող ցուցանակը ակնհայտ կերպով տեղաշարժված է: Որոշ պատուհաններ շարված են, իսկ մյուսները ծածկված են Ադրբեջանի Հանրապետության ազգային գինանշանով՝ լուսինն ու մահիկը հռազույն դրոշի վրա: Եկեղեցու ներքնամասը օգտագործվում է աշխարհիկ նպատակներով. ներսում արևելքից արևմուտք կառուցված է աղյուսե խորդուբորդ միջնորմ: Հարավային մասն օգտագործվում է որպես խաղասենյակ. որտեղ տեղադրված էին խաղասեղաններ, իսկ հյուսիսային մասը հատկացվել է մի շինարարի, որը գաջե կաղապարներ է պատրաստում շենքերի համար:



Բաքվի Ս. Գրիգոր Լուսավորիչ եկեղեցին.
Լուսանկարը Դայր Ֆիլիպի

Ինձ ասացին, որ եկեղեցին սկսվում է վերանորոգվել, րայց ներս մտնել չթողեցին: Իմ դիտարկումն այս պատկերի մասին կատարվել է դրսից և անհնար էր տեսնել նաև եկեղեցու արևելյան մասը, որպեսզի կարողանայի տեսնել. թե ինչ վիճակում է գտնվում նաև խորանը: Այս մի քանի պատկերները հնարավոր եղավ լուսանկարել միայն շենքի արտաքին կողմից: